

FPP BizNewz

June - November 2022

MANAGEMENT • INVESTMENT • ECONOMICS • ENTREPRENEURSHIP • TECHNOLOGY

Endometriosis

Sejauh Mana Kesedaran Anda?

Personal Shopper

What You Need To Know

Sustainable Packaging in eCommerce

A Few Solutions to Protect the Planet

Type text here

How To Teach Your Children To Pack Their Backpacks For Travel? An Easy Guide

A Short Vacay in Hat Yai

My Sister, My Best Friend

Kredit Mikro di Malaysia

H0BI



Publication Date
8 November 2022

Photo by Matt Chambers on Unsplash

AKU DIA & NICU

Siri 5

¹Nik Noor Afizah Azlan & ²Mazlan Mat

¹Fakulti Pengurusan dan Perniagaan, UiTM Cawangan Terengganu

²Lembaga Hasil Dalam Negeri Malaysia, Terengganu

emel: nikno561@uitm.edu.my

..... Kami sampai di hospital lebih kurang pukul 3 pagi. Selepas proses saringan dan makan ubat, bacaan tekanan darah turun sedikit namun masih tinggi. Bayi dalam kandunganku tidak lagi bergerak. Terus aku dibawa ke wad bersalin untuk dipantau sementara menunggu doktor pakar yang bertugas tiba. Jururawat membuat pemeriksaan ke atas bayi dalam kandunganku. Alhamdulillah, degupan jantung masih ada namun bacaan Cardiotocography (CTG) kurang cantik. Jururawat membekalkan oksigen kepada aku agar oksigen tersebut sampai kepada bayi dalam kandunganku. Ketika itu, hatiku mula rasa gelisah, risau dan tidak keruan. Macam-macam perkara bermain di benak fikiran. Mulut ini tidak henti-henti berdoa kepada Allah agar dipermudahkan segala urusan dan selamat semuanya. (...dari Siri 4)

Tiba-tiba... "Assalamualaikum... Saya Dr. Awang Nila. Saya ada terjumpa dengan Lan di tingkat bawah", sambil beliau melihat laporan pemeriksaan kesihatan aku dan bayi dalam kandunganku ini. Aku keliru dengan "Lan" yang dimaksudkan. Mana tidaknya, si suami namanya Mazlan, si abah namanya Azlan. Dua-dua nama panggilannya "Lan".

"Ini anak sulung Lan lah ya?" sambung doktor pakar itu tadi. Barulah aku faham, Lan yang dimaksudkan adalah ayahku sendiri. Jadi aku mengangguk sambil tersenyum.

"Kami satu sekolah dulu. Lan tu nakal dari zaman sekolah lagi, tapi saya lagi nakal..hahaha. "Ada lagi kawan kami yang nakal" sambil beliau tergelak kecil dan menyambung lagi kisah zaman sekolah mereka. Lucu mendengarnya. Rupa-rupanya beliau rakan sekolah abahku. Leka mendengar doktor pakar tersebut bercerita, hilang sekejap kerisauan yang bermain di fikiranku.

Setelah beliau membuat pemeriksaan, aku kuatkan semangat bertanyakan kondisi bayi dalam kandunganku. Beliau menerangkan satu persatu bacaan CTG yang diperolehi dan berdasarkan penerangan tersebut, aku faham bahawa bacaan CTG bayi dalam kandunganku ini tidak stabil dan sangat-sangat lemah. Beliau juga membuat perbandingan bacaan CTG yang normal dengan bacaan bayi dalam kandunganku. Bekalan oksigen yang diberikan kepadaku sebelum ini tidak memberi apa-apa kesan kepada bayi dalam kandunganku.

Beliau juga menerangkan secara terperinci risiko-risiko yang bakal dihadapi dengan keadaan bacaan tekanan darah aku yang terlalu tinggi dan tidak stabil, kesannya kepada tumbesaran bayi di dalam kandungan, ubat-ubatan yang sesuai dan macam-macam lagi. Banyak ilmu baru yang aku peroleh daripada penerangan tersebut. Meskipun aku risau, namun aku yakin Allah akan berikan yang terbaik buat kami berdua. Mulut ini tidak lekang dari berzikir dan berdoa moga Allah beri kekuatan untuk aku tempuhi segala ujian yang mendatang.

Selesai beliau memberi penerangan, aku dibawa ke klinik beliau untuk pemeriksaan lanjut dan imbasan ultrabunyi. Semasa dalam perjalanan daripada wad bersalin ke klinik pakar, kami terserempak dengan suamiku, abah dan mama. Doktor pakar mengajak mereka untuk bersama-sama ke klinik beliau.

Hasil imbasan ultrabunyi, beliau menyatakan bahawa jantung bayi di dalam kandunganku sangat lemah, kurang bergerak dan air ketubanku juga sudah mulai kering. Malah bayi di dalam kandunganku juga tidak membesar selari dengan umur kandunganku ini. Apabila memasuki minggu ke-32 kandungan, berat bayi sepatutnya di dalam lingkungan 2kg dan ke atas. Tumbuhannya tidak berubah semenjak 3 minggu yang lepas dan beratnya masih di dalam lingkungan 1kg sahaja.

Muka beliau berkerut-kerut dan terus memaklumkan kepada suamiku serta abah dan mama bahawa perkara ini sangat serius dan perlu dibincangkan dengan lebih lanjut. Jantungku berdegup kencang. Raut wajah suamiku serta abah dan mama juga penuh kerisauan. Beliau meminta kami semua untuk berserah pada Yang Maha Esa dan mendoakan yang terbaik kerana beliau tidak dapat memberi jaminan yang bayi di dalam kandunganku itu mampu bertahan untuk tempoh yang lama. Beliau mencadangkan agar aku dirujuk ke hospital kerajaan untuk rawatan lanjut kerana besar kemungkinan aku akan menjalani pembedahan kecemasan demi menyelamatkan kami berdua dan jika bayiku selamat, maka bayi itu nanti perlu ditempatkan di Unit Rawatan Rapi Neonatal (NICU) untuk tempoh yang lama kerana dilahirkan pramatang dan mempunyai risiko-risiko lain yang memerlukan rawatan rapi.

Luluh jantungku... Perasaan bercampur baur sambil menahan sebak. Mata suamiku

mula bergenang dengan air mata. Abah dan mama terkedu tanpa sebarang kata. Tiba-tiba abah bersuara, "Doktor, kita cuba dan ikhtiar yang terbaik untuk mereka." Tanpa berlengah, doktor pakar meminta kami memilih untuk dirujuk ke Hospital Universiti Sains Malaysia (HUSM) atau Hospital Raja Perempuan Zainab II (HRPZ II). Kami membuat keputusan untuk dirujuk ke HUSM. Terus beliau menghubungi wad bersalin di HUSM dan menerangkan keadaanku kepada doktor yang bertugas. Kemudian, beliau menghubungi seseorang dan dari cara percakapan mereka, mereka sangat rapat antara satu sama lain. Sangat terperinci beliau menerangkan tentang keadaan kesihatanku dan bayi dalam kandunganku.

Kami hanya menunggu arahan seterusnya. Setelah selesai mereka berbual dan berbincang, sambil tersenyum, doktor pakar memaklumkan yang beliau telah menghubungi sahabatnya yang merupakan doktor pakar dan juga ketua bahagian Obstetrics & Gynaecology (O&G) di HUSM. "Jangan bimbang, insyaAllah sahabat saya akan uruskan Afizah di sana", kata beliau kepadaku. Beliau mencadangkan agar aku segera ke HUSM sendiri tanpa perlu menunggu ambulans kerana dikhuatiri lambat.

Tanpa berlengah, aku dan suamiku terus ke HUSM manakala abah dan mama membantu menyelesaikan urusan di Hospital Pakar Perdana. Sesampai kami di HUSM, terus aku dimasukkan ke salah satu bilik di wad bersalin. Bilik persediaan mungkin. Semuanya telah tersedia, doktor dan jururawat bertugas terus membuat pemeriksaan terhadapku dan menjalankan beberapa prosedur. Keadaannya sangat pantas, masing-masing menjalankan tanggungjawab masing-masing dengan sangat efisien. Aku hanya mampu berserah dan pasrah. Doktor yang bertugas ketika itu menjelaskan kepadaku keadaan aku dan bayi dalam kandungan yang sangat berisiko tinggi. Beliau juga memaklumkan yang pembedahan kecemasan perlu dilaksanakan demi menyelamatkan kami berdua. Aku mengangguk tanda faham. Doktor tersebut terus menghubungi seseorang.

Tidak lama kemudian, kecoh kedengaran di luar bilik persediaan tersebut. Hatiku berdegup kencang. Aku tertanya-tanya, apa yang terjadi di luar bilik tersebut?

..... bersambung....



BizNewz 2022
Faculty of Business and Management
Universiti Teknologi MARA Cawangan Terengganu, Kampus Dungun
Sura Hujung, 23000 Dungun, Terengganu, MALAYSIA
Tel: +609-8400400
Fax: +609-8403777
Email: biznewzuitm@gmail.com